

四庫全書

子部

欽定四庫全書

六藝之一錄卷三百八十七

錢唐倪濤撰

歷朝書譜七十七

明賢墨蹟

詩翰

文衡山題詠遺蹟

卜築清溪上粼粼玉一灣
開門迎曉日隔浦見西山
春浪桃花亂晴沙白鳥閒
思親意無限遺澤釣遊間
右清溪春思

境寂畫偏永。心清暑氣微。老兼疎筆硯。性復懶裳衣。隱
几雙桐轉。褰簾獨鳥飛。茗薰聊自適。不怪客來稀。右
夏日停雲館作文壁

積雨浮宿潤。新晴人意適。消搖竹窓中。啼禽破幽寂。初
陽動簷瓦。殘溜時自滴。曲巷行跡稀。苔花繡深壁。右
即事一律

探梅山寺日斜時。一月梅花尚滿枝。勒雨故教開獨後。
尋春却恨到來遲。香撩短鬢風前韻。水洗微脂雪後肌。

悔不淹留到深夜坐看殘月上疎籬

惆悵羅浮夢破時居然消息在南枝餘寒雪逕春迴淺
薄晚林塘月上遲翠竹參差明縞袖冷雲依約護香肌
山公早辦風前醉不恨歸來倒接羅 右竹堂寺看梅
花之作徵明

澹烟蒼靄晝沈沈白髮青春好自禁寂歷梅花猶勒雨
蹉跎人日苦多陰步來野逕緣溪靜愛此茆堂入竹深
車馬不驚魚鳥狎居然城市有山林 壬辰人日與之

北城別業小集是日風雨寂寥梅萼未破故詩及之徵明

木末層軒倚空寥西風白首不勝搔天垂一鏡蓬壺近
雲擁千峰佛刹高雨後新波浮碧落烟中遠渚見黃茅
晚晴長嘯下山去一徑松風萬壑濤登玄墓閣

天池日暖雨煙生上已行遊春服成試向水邊修禊事
忽聞花底語流鶯空山靈迹千年祕勝友良辰四美并
一歲一回春不厭故園光景有誰爭

短簿祠前樹鬱蟠生公臺下石屏顏千年精氣池上劍
二壑風烟寺裏山井冽雨泉茶可試草荒支磳鶴空還
不知清遠詩何處翠壁苔花細雨斑

島嶼縱橫一鏡中濕銀盤浸紫芙蓉誰能胸貯三萬頃
我欲身遊七十峰天遠洪濤翻日月春寒澤國隱魚龍
中流彷彿聞雞犬何處堪追范蠡蹤

半醉高樓徙倚中葛巾平岸欲凌風山橫天際晴雲碧
錦爛城頭落日紅千里關河都會壯萬家烟火歲年豐

望京懷古非吾事病目猶堪送遠鴻
登樓

簷前朝雨疎疎落堦下春泥活活生
懶不出門驚樹合
醉能開閣看雲行幽深獨有閒諳得
迂僻都緣病養成
報道東風三月盡一場花事却關情
雨中偶述

夕陽樓上看新晴凌亂歸雲冉冉明
萬里快瞻飛鳥沒
一番又是綠陰成帶城碧瓦參差合
隔水蒼烟繚繞生
懷袖欣然風拂面醉聽乾鵲語前楹
新晴

綠陰如水夏堂涼翠簾含風午夢長
老去自於閒有得

困來每與客相忘
松窓試筆端溪滑
石鼎烹雲顧渚香
一鳥不鳴心境寂
此身真不愧羲皇
夏日睡起

傍市柴門鎮日開
心閒車馬不驚猜
雨中秋事芙蓉盡
霜後時新橘柚來
張翰未誇菰米飯
陶潛自醉菊花杯
近來較似嵇中散
滿架殘書懶更裁
秋日閒居

江上疎疎梅子雨
烟中嫋嫋竹枝歌
暖風初汎青蓮舫
新水平添綠玉坡
南去春光歸院寂
西來山色過橋多
美人只在橫塘曲
手把芙蓉奈遠何

一枕清風卧北窓高樓六月似秋涼陶情圖史忘貧病
夾耳笙歌欲老狂客至僅能修茗供心閒聊爾續爐香
淹留不覺斜陽盡月印花梢上短牆

急雨中宵六月涼朝來新水滴橫塘一番白苧生秋意
無數青山上野航日暖晴沙鳧鴨亂風來前浦芰荷香
曾探世事驚塵土轉覺江湖興味長

小齋如翼兩楹分矩折分明玉磬陳蹈海要非平世事
過門誰識有心人屋頭日出烏棲曉簷隙香沈燕壘春

手種雙桐才數尺濃陰已見綠勻勻

睡起西齋片雨過綠陰亭院晚涼多烏衣春盡渾無語
白苧秋來漫有歌世態風雲從變幻山林日月未蹉跎
却憐逸少猶多事時寫黃庭換白鵝

永夏茅堂風日嘉涼陰寂歷樹交加客來解帶圍新竹
燕起衝簾落晚花領略清言蒼玉塵破除塵困紫團茶
六街車馬塵如海不到柴桑處士家為松泉書

曾攜書冊住東甌此日因君憶舊遊落日亂山斜帶郭

碧天新水靜涵洲從知地勝身如隱近說官清歲有秋
西北浮雲應在念乘閒一上謝公樓 贈槐雨先生丈
壁

我生辛苦不逢辰見說丁年積漸亨力命相持懷禦寇
行藏無主卜君平尋常萬願空成感老大遭迴正坐名
勞謝微言知驗否秋風相送不勝情 贈日者徐生丈
壁

三十相將始洗兒百年迴首即非遲祖書敢謂今堪托

父道方慚我未知願魯難憑蘇子論勝無聊有樂天詩
人間切事惟應此對客那無酒一卮

春風一笑錦綳兒共道頭顱較我奇門戶關心能不喜
賢愚有命可容期百年正賴培來久萬事誰云足自茲
五十老親遺世網從今都是弄孫時賤子今年四月
十又三日始舉一兒彌月之次薄有湯餅之設因識二
詩邀在席諸君同賦是歲弘治丁巳予年二十又八徵
明書

文衡山今日歌 行草書

今日復今日今日何其少今日又不滿此事何時了人
生百年幾今日今日不為真可惜若言姑待明朝至明
朝又有明朝事為君敬誦今日詩努力請從今日始徵
明

珊瑚網一跋見前

文衡山書十美詩卷

傾國人多有美姿扁舟載去亦宜之戲瓢尚想當時事

深涉何曾讀衛詩 西施

浮生難比草頭塵常托千金視此身若使琴心挑得動
不知匪石是何人 文君

高抱琵琶障冷風淋漓衫袖濕啼紅安邊重用和親計
駕馭英雄已不同 明妃

倚竹眠床態自嬌夜深銀燭正高燒不將春舞歸長袖
宜自輕身好折腰 飛燕

飛絮無憑只趁風也知相逐水流東琉璃瓶薄珊瑚脆

毀不求全妾命同 綠珠

徙倚閒庭暗淚垂不須再讀寄來書已知一代容華盡
地下相逢未是遲 碧玉

梅花香滿石榴裙祇用微頻艾納薰仙館已於塵世隔
此心猶不負黃昏 梅妃

欲與君王共輦還馬嵬路狹轉頭難早知怨自思萌孽
悔不當時乞賜環 太真

閨門出入有常經女子何須獨夜行待月西廂誰唱始

至今傳說見分明 鶯鶯

短長闊狹亂堆牀
細染輕搥玉色光
豈是無心戀針線
要將姓字托文房
薛濤 徵明題

文衡山諸絕句

試茶初動蟹眼臨帖更畫烏絲
啜罷冷淘槐葉漸吟雙
調柘枝 擁褐一瓢濁酒支頤
半卷南華消受誰堪伴
侶紙窓殘雪梅花 右幽居二絕
徵明

黃金宮闕鬱嵯峨
秋色盈盈月漾波
吳下高枝元有種

天香莫怪屬君多
已酉七月數求將試應天賦此奉
贈徵明

千山疊翠斜陽外
萬壑爭流春雨餘
景色撩人歸未得
高情原不在溪魚

三月光陰修禊後
千村桃李杖藜中
何時去覓王玄度
把卷臨流一笑同

解帶禪房春日斜
曲闌供佛有名花
高情更在樽罍外
坐對清香薦一茶

小病淹愁百念慵時時清夢越城東春風閉戶草如積
落日倚樓山滿空

落落高松下午陰靜聞飛澗激清音幽人相對無餘事
啜罷茶甌再鼓琴

木多長夏翠交加野客孤吟坐日斜縱有殘春供醉眼
碧波深映紫微花

滿眼溪山迹未塵百年臺殿已沈淪只應寂寞蓮池水
曾照當時入社人

松葉滿山行逕微幽居更在竹叢西綠陰深寂詩成處
愛惜新筠不忍題

流泉爭瀉作狂瀾樹色蒼蒼帶遠山高閣清幽人共坐
不知日月幾摧殘

小閣登臨眼境奇水雲沙樹渺參差猶憐興淺匆匆去
不見湖中月上時

水展晴空秋色遠樹沈平野日光寒生綃萬幅天開畫
澄碧樓中暮倚闌

秋江雨過水潺潺疎樹平皋帶遠山正是幽人詩就處
小舟問我夕陽還

傳呼曲巷使君來樹底柴門懶自開老病迂疎非傲客
直愁車馬破蒼苔

誰見金鳬水底墳空懷香玉閉佳人君王情愛隨流盡
只有寒溪尚姓陳

殘冬相見還相別燈火幽幽燦玉缸正自多情眠不得
忽聽風雨打西窓夜與德孺坐小樓記此徵明

文衡山三題吉祥菴卷

徵明舍西有吉祥菴往歲嘗與亡友劉協中訪僧權鶴
峰過之協中賦詩云城裏幽棲古寺間相依半日便思
還汗衣未了奔馳債便是逢僧怕問山徵明和云殿堂
深寂竹床閒坐戀椶陰忘却還水竹悠然有遐想會心
何必在空山越數年過之則協中已亡因讀舊題追思
其韻塵蹤俗狀強追閒慚愧空門數往還不見故人遺
約在黃梅雨暗郭西山時弘治十四年辛酉也祇今正

德庚辰又二十年矣菴既燬于火而權師化去亦復數
年追感昔遊不覺愴惜因再疊前韻當日空門對燕閒
傷心今送夕陽還劫餘誰和邢和璞老去空悲庾子山
他日偶與協中之子穉孫談及因寫此詩追圖其事付
穉孫藏為里中故實云時十六年辛巳二月八日也

文衡山書拙政園記并詩卷

記文繁茲不錄

若墅堂在拙政園之中園為唐陸魯望故宅雖在城
市而有山林深寂之趣昔皮襲美嘗稱魯望所居不

出城郭曠若郊野故以為名

會心何必在郊垌近圃分明見遠情流水斷橋春草色
槿籬茅屋午雞聲絕隣人境無車馬信有山林在市城
不負昔賢高隱地手攜書卷課童耕

繁香塢在若野堂之前雜植牡丹芍藥丹桂海棠紫
瑤諸花孟宗獻詩云從君小築繁香塢

雜植名花傍草堂紫蕤丹艷漫成行春光爛漫千機錦
淑氣薰蒸百和香自愛芳菲懷滿袖不教風露濕衣裳

高情已在繁華外靜看遊蜂上下狂

倚玉軒在若墅堂後傍多美竹面有崑山石

倚楹碧玉萬竿長更割崑山片玉蒼如到王家堂上看
春風觸目總琳琅

怡顏處取陶詞晒庭柯以怡顏云

斜光下喬木睠此白日遲嬾人不可即暮景聊自怡青
春在玄髮莫待秋風吹

夢隱樓在滄浪池之上南直若墅堂其高可望郭外

諸山君膏乞靈於九鯉湖夢隱隱字及得此地為戴
顥陸魯望故宅因築樓以識

林泉入夢意茫茫旋起高樓擬退藏魯望五湖原有宅
淵明三徑未全荒枕中已悟功名幻壺裡誰知日月長
回首帝京何處是倚闌惟見暮山蒼

聽松風處在夢隱樓北地多長松

疎林漱寒泉山風滿清聽空谷度涼雲悠然落虛影紅
塵不到眼白日相與永彼美松間人何似陶弘景

園有積水橫亘數畝類蘇子美滄浪池因築亭其中
曰小滄浪昔子美自汴都徙吳君亦還自北都蹤跡
相似故襲其名

偶傍滄浪構小亭依然綠水遶虛楹豈無風月供垂釣
亦有兒童唱濯纓滿地江湖聊寄興百年魚鳥已忘情
舜欽已矣杜陵遠一段幽踪誰與爭

志清處在滄浪亭之南稍西背負修竹石磴下瞰平
池淵深泓渟儼如湖蒞義訓云臨深使人志清

愛此曲池清時來弄寒玉俯窺鑑鬚眉脫屣濯雙足落
日下迴塘倒影寫修竹微風一以搖青天散灑淥

小飛虹在夢隱樓之前若野堂北橫絕滄浪池中

雌霓蜺蜺飲洪河落日倒影翻晴波江山沈沈時未雩
何事青龍忽騰翥知君小試濟川才橫絕寒流引飛渡
朱闌光炯搖碧落傑閣參差隱層霧我來彷彿踏金鰲
願揮塵世從琴高月明悠悠天萬里手把芙蓉照秋水
意遠臺在滄浪池北高可尋大義訓云登高使人意

遠

閒登萬里臺曠然心目清水落秋更遠長江天際明白
雲渡水去日暮山縱橫

釣砦在意遠臺下

白石淨無塵平臨野水津坐看絲裊裊靜愛玉粼粼得
意江湖遠忘機鷗鷺馴須知續綸者不是羨魚人

來禽園在滄浪池南北雜植林禽數百本

清陰十畝夏扶疎正是長林果熟初珍重筠籠分贈處

小窓新搨右軍書

桃花汧在小滄浪東折南夾岸植桃花時望若紅霞
種桃臨野水春暖樹交花時見流殘片常疑有隱家微
波吹錦浪曉色漲紅霞何必玄都觀山中有歲華

槐雨亭在桃花汧之南西臨竹澗榆槐竹栢所植非
一云槐雨者先生自號也

亭下高槐欲覆牆氣蒸寒氣濕衣裳疎花靡靡流芳遠
清陰垂垂世澤長八月文場懷往事三公勲業付諸郎

老來不作南柯夢獨自移牀卧晚涼

爾耳軒在槐雨亭後吳俗喜壘石為山君特於盆盎
置上水石植菖蒲水冬青以適興語云未能免俗聊
復爾耳

有拳者石弗崇以巖上列灌莽下引寒泉有泉涓涓白
石齒齒豈曰高深不遠伊邇言敞東軒晚彼蘼棘君子
于何惟宴以適青青者蒲被于崇丘歲云暮矣式宴以
遊君子于遊匪物伊理古亦有言聊復爾耳豈不有營

我心則勞載欣載邀以永逍遙

芭蕉檻在槐雨亭之左

新蕉十尺強得雨淨如沐不嫌粉堵高雅稱朱欄曲秋
聲入枕涼曉色分窓綠莫教輕剪取留待陰連屋

槐幄在槐雨亭西岸古槐一株蟠屈如翠蛟陰覆數
弓

舊種宮槐已十圍密陰徑畝翠成帷夢回玄蟻爭穿穴
春盡青蟲對吐絲

湘筠塢在桃花汭之南槐雨亭北修竹連亘境特幽
迴

種竹遶平岡岡迴竹成塢盛夏已經秋林深不知午中
有遺世人琴樽自容與風來酒亦醒坐聽瀟湘雨

京師香山有玉泉君嘗勺而甘之因號玉泉山人及
是得泉於園之巽隅甘冽宜茗不減玉泉遂以為名
亦不忘也

曾勺香山水泠然玉一泓寧知瑤漢隔別有玉泉清修

綆和雲汲沙餅帶月烹何須陸鴻漸一啜自分明

瑤圃在園之巽隅中植江梅百本花時燦若瑤華因
取楚詞為名

春風壓樹森琳瑯海月冷掛珊瑚鉤寒芒墮地失姑射
幽夢落枕移羅浮夜深不奈東風惡酒醒參橫山月落
千年秀句落西湖一笑閒情付東閣只今勝事屬君家
開田種玉生琪華瑤環瑜珥紛觸目琅玕玉樹相交加
我來如升白銀闕綽約仙姬若冰雪彷彿蓬萊萬玉妃

夜深下踏瑤臺月瑤臺玉圓隔壺天遠在滄瀛縹緲邊
若為移得在塵世主人身是瓊林仙當年揮手謝京國
手握寒英香沁骨萬里歸來抱雪霜歲寒心事存貞白
嗚呼歲寒心事存貞白憑仗高樓莫吹笛

嘉實亭在瑤圃中取山谷古風江梅有嘉實之句因

次山谷韻

高人夙尚志脫冠謝名場中心秉明潔皎然秋月光有
如江梅花枝槁心獨香人生貴適志何必身巖廊不見

山木災犧罇漫青黃所以鼎中實不愛時世嘗曾不如
苦李全生衢路傍惻惻不忍置悠悠心自傷

竹澗在瑤圃東夾澗美竹千挺

夾水竹千頭雲深水自流迴波漱寒玉清吹雜鳴球短
棹三湘雨孤琴萬壑秋最憐明月夜涼影共悠悠

得真亭在園之艮隅植四檜結亭取左太沖招隱詩
竹栢得其真之語為名

手植蒼官結小茨得真聊咏左沖詩支離雖枉明堂用

常得青青保四時

珍李坂在得真亭後其地高阜自燕移好李植其上
珍李出上都辛勤遠移植却笑王安豐當年苦鎖核
玫瑰柴匝得真亭植玫瑰花

名花萬里來植我牆東曲曉雨散春林濃香浸紅玉
薔薇徑在得真亭前

窈窕通幽一徑長野人緣逕擷羣芳不嫌朝露衣裳濕
自喜春風屐齒香

水華池在西北隅中有紅白蓮

方池涵碧落菡萏在中洲誰唱田田葉還生渺渺愁仙
姿淨如拭野色淡如秋一片橫塘意何當棹小舟

深淨亭面水華池修竹環匝境極幽邃取杜詩云

綠雲荷萬柄翠雨竹千頭清景堪消夏涼聲獨占秋不
聞車馬過時有野人留睡起龍團熟青烟一縷浮

柳隩在水花池南

春深高柳翠烟迷風約柔條拂水齊不向長安綰離別

綠陰都付曉鶯啼

芙蓉隈在坤隅臨水

林塘秋晚思寥寥雨浥紅渠淡玉標出水最憐新句好
涉江無奈美人遙

待霜亭在坤隅傍植柑橘數十本韋應物云洞庭須
待滿林霜右軍黃柑帖亦云霜未降未可多得

倚亭嘉樹玉離離照眼黃金子滿枝千里勤王苞貢後
一年好景雨霜時向來屈傳曾留頌老去韋郎更有詩

珍重主人偏賞識風情原許右軍知

右拙作前有行書已錄似槐雨先生矣先生因畫烏絲
精絕命再書小楷一過務欲盡其醜也甲午春二月望
衡山居士文徵明題

文衡山致仕出京一首

獨驅羸馬出楓宸回首長安萬斛塵
白首豈堪供世事青山自古有閒人
荒餘三徑猶存菊興落扁舟不為尊
老得一官常卧病可能勲業

缺三字徵明

文壽承詩帖諸蹟

心愛躬耕好身於畎畝宜辛勤自食力骯髒已非時征
役吳民困風塵戍卒悲一燈論世事不覺淚交頤文彭

題扇

風雨來何迅山堂自晝昏斜飛愁入座縣溜訝翻盆望
望委疇黍哀哀何處村皇天應有意且罄手中樽文彭
書屏

八月燕山颯素秋華堂高宴亂觥籌圍棋不賭山陰墅

看月常懷太白樓萬里飛騰心已盡一時嘉會興難酬
淹淹不醉歸無計卜夜應須暫爾留

月上瑤臺興轉高此時直欲數秋毫持杯無奈金波灩
晤語何妨玉漏迢帝里風光開勝賞天涯鴻雁下青霄
孟公不必先投轄忍使良宵漫寂寥楊通政宅看月
二首文彭

燕山西面擁皇都曲曲樓臺審畫圖瑤草琪花紛玉澗
璇題金榜映珊瑚烟霞自昔稱靈境風物如聞入化區

咫尺紅塵不能到夢遊何日訪蓬壺
劉羽泉約游西

山不果作文彭

鏡湖湖水如鏡平峯巒蒼畫搖空明浮雲靉靄自來往
輕舟迅邁勞逢迎白鷗飛飛映山遠青蒲曲曲隨洲生
風流賀八已千載轉憶悠悠身後名
鏡湖

仲夏新晴事事宜定爐香藝海南竒雙鈎淳化義之帖
細讀開元杜甫詩石鼎鼃閒鬪茗枰剝啄試圍棋
新篁脫粉芭蕉綠不怕星星兩鬢絲
壽承

幽谷質不變入室覺無香所以君子心兩兩自相忘
錦江春色麗錦樹艷生輝婀娜臨風處偏增蜂蝶飛
瓊花開六出雪片舞千枝清夜撩明月穠香入蕙帷
五月數新艷朝暉麗緋妝空庭有佳色密葉映斜陽
千蕊復萬蕊初疑安石榴分房出韶艷循玩及清秋
秋葵有佳色日吐淡鵝黃楚楚山亭下孤雲映淺妝
清露下江皋秋色淨如洗中有弄珠人盈盈滴秋水
素足明寒水輕盈雲裏身凌波何處去闌住軟香新

右題畫蘭花海棠梔子石榴紫薇秋葵芙蓉水仙共八
絕句三橋居士書

聲確高岡細路環離離樹影夕陽間分明秋日龍江道
馬上遙看隔岸山

十日春陰不裏巾喜看庭際綠苔新山齋聽雨惟高卧
忘却門前問字人

玉色吳牋勝陟釐端州古硯墨花垂試拈閣帖間臨草
不是羲之即獻之

文休承詩草

夜半羣動息五更有夢殘天雞叫一聲萬枕不遑安一
日一百刻能有幾刻閒當其閒睡時作夢更多端窮者
夢富貴達者夢神仙夢中亦役役人生良尠歡文水道
人謾語江南五月暑未足終日只聞霖雨聲閉門愁
坐自蕭索前溪水滿菰蒲生故人落寞忽在眼登堂一
笑空相驚相驚猶未歇雲暗關山月君今棄我去令我
心如缺欲止不可攀欲留不可說始知會合各有時何

必淋漓托酒卮君今歸去自結湖山游我今落落復作
城市儔感君佳意為君說說罷不覺令人愁

乘興叩禪關蕭然竹樹間路應迴九折屋只住三間
白月懸鏡花明菊破顏茶香解留客深夜不知還
訪
適園上人月白竺文嘉

湖上洞庭秋可憐玉方壺浸兩青蓮輕舸獨濟欣無浪
病骨驚寒欲絮綿開展白詩愁漫興偶題黃雀入新篇
近來我亦開涓滴半醉懷人一惘然

二月竹堂梅萼明倚簷草樹雪濤平春陰漠漠江樓迴
日暮迢迢湘水清長憶深杯臨古樹肯拚棋局對殘英
閉門逸興何由遣坐看堦前綠草生

歸來三徑未全荒拂拭重開舊草堂
渠几淨揩平似鏡硯池新浴燦生光
客來親戚情多悅老去詩篇意未忘
莫道歸遲遲亦好猶勝終老殢他鄉
茂苑文嘉書

文休承書松壑虎嘯詩

吳之西山舊無虎戊戌之春忽橫行林間因

尋先人葬地與宿田兄同經其間且怖且行
道逢山農多能形容其威猛作山有虎二章
系于圖後歸之宿田云

西山人家傍山住唱歌上山採茶去下山落日仍唱歌
路黑林深無虎慮今年虎多令人憂遶山搏人茶不收
牆東小女膏血留南村老翁空髑髏官司射虎差弓手
自隱山家索雞酒明朝入城去報官虎畏相公今避走
西山有虎動成羣小兒夜啼爭撞門衆中最猛說白頰

當晝磨牙當道躑躅腥風衝人行不得行人出門便愁食
青天白日奈爾何老夫却愁陰類多 長洲沈周

成化十五年後十月常熟縣有虎來尚湖居
民及其半濟殺之以送之縣縣復獻之府人
莫以為異也因而作歌以紀之寫附此圖之
後

昔聞虎渡河去今見虎過河來深林幽谷不肯住青天
白日來此胡為哉昂頭豎尾不聞吼頃刻便能登崖走

健兒操舸徑乘之長篙殺之如殺狗曳來大道腥風起
此畜祛除人盡喜縣官見之心亦驚連呼壯士有如此
祥耶異耶人籍籍獻之大府喧自息府中諸衙盡鬻分
髑髏為枕皮為席食其肉寢其皮虐人之報當如斯嗚
呼虐人之報當如斯為人之上者寧不思李應禎

何人捉筆題猛虎出山耽耽氣猶怒即欲當前一挺之
自笑書生不能武亂山西繞洞庭波山下爭傳虎迹多
千年故事劉昆得何日離山還渡河予書題虎圖實

與石田同一感題之意宿田翁語書之予何可辭萬厯
乙亥仲夏十有一日文嘉錄于蔭白堂

文道承詩帖

行書灑金烏絲闌紙

笑遣端君待謫仙詩壇從事已三年摧頽恰似經千載
珍重曾將質百錢藝苑論材終是石書生食力此為田
謝君通義能還我依舊山齋續舊緣 謝張仲舉以舊
硯見還

溪頭獨樹古藤垂冪厯繁陰翠陸離不用過橋看竹圃

祇須因樹結茅茨蒼根蟠鬱空山老修帶園環近水奇
安得移家來此住臨流終日賦新詩支硎道中古藤
山縣寒梅吐獨遲水邊忽見影離離千林臘勁香含樹
一塢春浮玉滿枝雨雪載塗如在畫風烟觸目易成詩
因思去歲城南畔對酒高歌正此時句容道中梅花
圍爐守歲坐深更想見烟花滿鳳城千里孤燈君對子
一年今夕我懷兄生涯筆硯貧依舊老頌椒花句不成
南北春風同換歲輸君先聽上林鶯除夕寄京友

鐵甕城邊夜泊舟孤懷黯黯獨成愁雙蓬髻作南徐客
萬里烟橫北固秋老驥槽間空遠志枯桐爨下有誰收
遙思五馬停驂處明月烟花滿鳳樓 潤州江樓

江南三月桃花雨綠暗紅稀春欲歸鷗鷺即看當檻浴
水痕依舊上柴扉 夜雨絕句

戊午秋八月望日梅灣山人文仲義書於營居齋中

文啟美看桃花詩帖

楊柳絲青欲繫船船頭紅紫趁人鮮千村煖霧烘茅屋

一道晴霞入墓田
客醉轉思留客雨
花深更愛養花天
斜陽渡口從相識
桃葉桃根不記年
看桃花作似之
梁先生文震亨

六藝之一錄卷三百八十七

欽定四庫全書

六藝之一錄卷三百八十八

錢唐倪濤撰

歷朝書譜七十八

明賢墨蹟

詩翰

沈石田謝祝希哲詩卷

疎林葉盡秋日晴與子把手林中行蕭條此地不足枉
責我一來林壑榮君今文名將蓋代蹤跡所至人爭迎
青袍獵獵風滿袖知者重者無公卿老夫朽憊人所棄

子謂差長加其情臨分日落渺野水扁舟南驚迷孤城
弘治甲寅十月廿四日希哲冒寒過訪申謝此卷不
足罄懷 沈周

沈石田贈楊子詩帖

楊子勸秉良工詩畧於琴我勸併二者手彈口還吟琴
詩本性情淵淵入人深推自三百篇被樂為雅音雅音
宣其文成古復成今悠然南薰詞煦矣當舜心

沈石田中秋月詩

行書掛幅

少年漫見中秋月視與常時不分別老來珍重不易觀
要把深杯戀佳節老人能得幾中秋信是流光不可留
古今換人不換月舊月新人風馬牛後生茫茫不知此
年年見月年年喜老夫有眼見還同感慨滿懷聊復爾
今宵十四已爛然七客賓爭天下先庭空衣薄怯露氣
深簷穩坐仍清圓東風軋雲輕浪作驀把太清渣滓却
浮雲雖欲忌吾人酒政有律無譁賓遞歌李白問月句
自覺白髮欺青春青春白髮固不及且捲酒杯連月吸

舒菴與我六十人更問中秋賒四十 沈周

沈石田看花吟

花下一壺酒人與花酬酢樹上百枝花花對人嬋娟昨
日顏色正新鮮今朝少覺不如昨人若無花人不樂花
若無人花寂寞看花不是久遠事人生如花亦難托去
年花下看花人今年已漸隨花落花且開酒且酌催花
鼓板撾芍藥醉他三萬六千觴我與花神作要約 沈

周

沈石田書諸歌行卷

今日九月九無菊且飲酒明年九月九有菊亦飲酒有
花還問酒有無有酒不論花無有好花難開好時節好
酒難逢好親友一杯兩杯常在手六印何消金握斗三
杯五杯不離口萬事莫談瓶且守瓶云罄矣我即休載
欲謀之已無有天應私我身獨在天不全人花乃後遲
之明日興還存紫萸青茱得開否倘開爛漫即重陽借
問東牆惱鄰叟

右九日無菊歌

春暖秋涼山邊水隈訪黃菊尊白梅秋月自與我慮淨
春雲自與我懷開晝游之地吾蓬萊夕息之處吾夜臺
以殤視我吾老大以彭視我吾嬰孩信壽夭吾何以外
請享此見在不樂胡為哉 尊樂行

打漁鼓唱道情說生說死說功名唱道情打漁鼓說神
說仙說今古仙家自有山中樂凡家自有世間憂年頭
年尾說不休今夜又當年尾頭唱要高鼓要急主勸賓

酌忘拜揖蠟梅爍爍白壁光酒波濯濯青袍濕客莫言
辭主須醉多情送年恐不及年送去還復來漁鼓聲中
白髮催白髮不可變莫放掌中杯鼓磬蓬杯絡繹不知
東方之既白舊年已盡客已散門前又接新年客新年
別唱賀新郎送舊迎新漁鼓忙 右送歲歌

去之歲來之年一迎一送燈火邊迎新送舊大家事覺
與老者偏無緣黃雞未號霜滿天一心百感誰慙然小
兒自喜時節至催理靴服誇新鮮固知老者已異趣青

春似因兒女妍青春懸老不多地白髮紅顏俱眼前去
之歲來之年譬如傳馬相絡繹又如車輪相回旋誰從
箇裡饒不死燕氣苦苦修神仙我於所去已五十其來
百歲亦倘焉使我五十不為天使我百歲不為延尚有
大而去者與來者在我先後計萬不計十其間豪傑夢
幻耳冥冥漠漠真堪憐惟有青竹數行墨待來追去名
可傳勸兒必讀床頭編莫惜買書吾無錢男兒所立須
及早老夫待爾耕春田 右除夕歌 沈周

沈石田五言律詩牋

結廬城郭遠，靜勝此溪邊。
鷗鷺分家住，煙波入簾眠。
釣魚償酒券，賣藕補傭錢。
只隔斜陽岸，經遊須倩船。

舊有讀書處，杏花深雨中。
人歸髮未白，春好樹仍紅。
富貴浮生外，弟兄吾道同。
眼前千樹合，屋下兩陶翁。

九十春將半，陰陰何日收。
花含無蝶戀，苔濕碍人遊。
樹陰呼朋鵲，簷多逐婦鳩。
催詩應是酒，何必與添愁。

詠人影

愛欲揮杯勸其情有唱隨無違起居地尚保死生期明月成三處清波化百時冥然通契誼曾莫假言辭

沈石田書七言律諸作

掃地焚香習燕清蕭然一榻謝將迎坐移白日花間影
睡起春禽竹外聲心遠不妨人境寂道深殊覺世緣輕
問奇尚有前門客却怪青山不掩名 沈周書於獨墨
亭

今日都非昨日時紅消綠長不容私初驚雨過佳人夢

漫送春歸老子詩繞樹空憐雙蛺蝶戲波忙殺小魚兒
明年更有尋芳酒何用臨川費所思

春風不到小樓前花事闌珊又一年處處挿秧梅子雨
家家繅蠶竹枝煙荷知有暑先擎蓋柳為無寒已脫綿
莫道山家無意味鳥聲啼破落花天

城郭重來秋半過世情看熟歲應磨後生氣大輕人易
老者心寬奈事多空自感懷成永歎不如對酒付高歌
韓休共是霜顛客松竹相依奈晚何

風波境界立身難處世規模要放寬萬事盡從忙裡錯
此心須向靜中安路逢平處經行穩人有常情耐久看
直道世間無悔吝纔生枝葉便多端

渺渺扁舟入浦雲琳宮一到愜前聞春泥夾道縈人迹
野水交陂亂鴨羣洞裡朝元郭道士城中行藥鮑參軍
相尋兩度俱相失石上留題漫有文

上人何事作生涯半是仙家半出家丹竈火紅煨白朮
戒壇煙黑煮硃砂杏林春透菩提樹橘井泉涵優鉢花

賣藥歸來無箇事月明窻下誦蓮花
贈醫僧

高隱白雲深復深階除晴晝亦生陰
山藏暝色迷歸鶴
窗捲朝嵐恐潤琴忽爾去留那有迹
飄然舒卷絕無心
道人只自閒怡悅俗客要來難便尋
右贈顏魯南隱
君之作詩成三年未嘗書寄適魯南持紙來索畫卷因
系此篇 沈周

顛毛脫盡野僧如世事多歸一懶除
欲博晏眠高著枕
圖便老眼大鈔書屋須矮小茅須厚
窻要清虛竹要疎

心與陶翁有相得時歌吾亦愛吾廬

慙慙無役老人懷春日烘門晏始開遊行太平初試杖
安排樂事且拈杯世情花黨富家發公道燕均貧戶來
識字不多強不識小軒聊與物追陪

昭明臺下芒鞋緊虞仲祠前石路迴老去登臨誇健在
舊遊山水喜重來雨乾草愛相將發春淺梅嫌瑟縮開
傳取梁前檜神去袖中疑道有風雷 虞山至道觀有
所謂七星檜者相傳為梁時物也今僅存其三餘則後

人補植者而三株中又有雷震風擘者尤為詭異真奇
觀也成化甲辰日周

爛漫初看蜀錦堆却疑春色隔牆來酒逢知己何辭醉
花笑貧家不稱開紅亞暖風憐弱蒂粉含清露濕重臺
明朝只恐多零落為轉長生托紙胎 辛丑牡丹爛開
余與允輝同賞有此詩壬寅開不及往喜允暉亦凭闌
因書前作以寄孤興沈周

眾客巡籬待菊開吾家阿弟足清醅莫嫌蘂小劉先賞

若使花殘悔後來宿雨尚搖枝上葉新香初入掌中杯
頭中墮地秋襟濕不怕傍人笑醉回 乙卯十月四日
賞翼南莊上半開菊因有是詠古梅在坐為錄一過沈
周

誰放春雲下曲瓊一重薄隔萬重情珠光蕩日花無語
瑣影通風吹有聲外面令人倍惆悵裏邊容眼自分明
知無緣分難輕入敢與楊花燕子爭 詠簾

滿城風雨近重陽寂寂寥寥破草堂彭澤花枝待晴把

雲安麴米帶生嘗梳頭髮應吾年白潤屋金從別姓黃
漸與潘郎續遺句沈郎瘦不似潘郎 沈周為冷菴先

生作

滿城風雨近重陽車轍何人顧草堂此日不成聊自
授明朝酒熟共誰嘗秋深澤國尊空紫霜落洞庭柑
未黃底怪白頭甘寂寞子雲曾是校書郎徵明奉次

沈石田尋芳詩

行書長幅

老子尋芳挑酒錢樂哉斯邱青嶂邊若教即死便埋我

更是可生還聽天人生一日過一夢花下百壺酬百年
還將醉墨寄絕壁風雨不洗山蒼然 右題墓上絕壁

沈周

沈石田雜題絕句

湖北歸來日落扁舟滿載西風目送一行白鷺秋懷欲

與天空

六言

衣冠瀟灑本吾儒也學玄真作釣徒風月一竿休占盡
客星昨夜照東吳

酒盞詩聯不厭頻
梅花已報滿城春
疎燈一夜山窗雨
却寫鄉心與故人

不將綠醕醉春寒
但把黃庭讀夜闌
三月溪亭新漲滿
廬山瀑布捲簾看

百尺飛泉木數章
茆椒回互茯苓香
白頭漁父拋魚舫
結得廬鴻一草堂

溪流泯泯帶斜汀
樹色沈沈綠未明
大似城南春雨歇
碧山浮動晚煙生

山路迢迢過翠微
楓林斜日映人衣
筇枝兀兀藤花去
不得詩成且不歸

樹裡幽亭久不來
田時行徑有蒼苔
溪風四面涼如水
袖得葩經手漫開

艾葉葵榴亂挿瓶
虛堂風約虎符靈
樽前蒲玉須教醉
溷俗由來忌獨醒

溪頭待渡心不忙
日落高人猶偃仰
歸來只恐到家遲
隔岸行人豈吾黨

鳩一聲時鵲一聲鳩能喚雨鵲呼晴老天亦自無張主
半日晴來半日陰

春日春山春水流春田春地放春牛春花開在春園裏
春鳥飛來春樹頭

如來如來太乙裁掛鉢披袈海上來不為一身南北走
願超千衆上蓮臺

出入行藏要三思世情更變斗星移常將有日思無日
莫待無時思有時

富友高親莫去攀他來問我奉承還錢財入手非容易
用去方知來處難

自家只道是童兒誰信光陰驀地移算來三萬六千日
總成四十九年非

分中自有魚羹飯意外休編虎口鬚莫怪老夫為妄語
一生夢寐慣江湖

此詩題
寄饑饉

楊柳青青江水平聞郎江上唱歌聲東邊日出西邊雨
道是無情却有情

風前一曲動離愁那箇行人不舉頭手把花枝半遮面
不令人見轉風流

毛竅黃茸嫩似鋪頸長高閣玉胡盧老夫此筆非無意
留與賢郎學弄維 甲午春三月望為冷菴憲副作沈
淵

買書賣畫出春城看破青衿白髮生四海固無知我者
空教啼殺樹頭鶯

吳淞江上老迂疎自笑年來活計無只有硯田耕未了

雲山還向筆端鋤 秋日同友人步虎邱倦坐可中庭
上值談空上人持筆索書漫錄舊作二首長洲沈淵

式古堂書畫考云啓南大父字孟淵沈淵似非啓
南也珊瑚網錄沈淵諸詩于啓南雜題絕句之末
今仍之

饑時思飯倦思眠只在茅簷日晷邊此是老夫真活計
十年修得在家禪

沈石田壽張保州詩帖

張公符竹照保州今之太守古諸侯民和物阜政始修
何乃便有邱園謀江東萼菜紫絲柔香粳如玉酒如油
雙溪風月那可留左招赤松右浮邱天子不阻南歸舟
吳山吳水小瀛洲晴雨雪月俱堪遊有詩自唱酒自釀
百篇一斗百不憂醉中倒披紫綺裘瑤池桃花插滿頭
笑呼秦女彈箜篌朱簾高啓望京樓裴家綠野亞風流
張公手持海屋籌人間小住三千秋門生沈周拜稿呈

唐伯虎詩蹟

人生七十古來有處世誰能得長久光陰真是過隙駒
綠鬢看看成白首積金到斗俱是閒幾人買斷鬼門關
白日升天無此理自古有生還有死眼前富貴一枰棋
身後功名半張紙古稱彭祖壽最多八百年後還如何
請君聽我歌且舞窮通壽夭皆由他

都憑乖點討便宜我討便宜只是癡把日繫繩終不住
待天倚杵是何時隨緣冷暖開懷蓋不計輸贏伴手棋
七尺形骸一棺土任他評我是和非 漫興

措身物外謝時名著眼閒中看世情人算不如天算巧
機心爭似道心平思量昨日疑前世睡起今朝是再生
說與明人應曉得與愚人說也分明 六如居士

席地松陰樂有餘瓦盆盛酒炙枯魚心中洗盡閒名利
一派泉聲應讀書

一雨江南水接天春山凝翠樹浮煙飽看山水歸來晚
隔岸應須買渡船

平日春醪賤可賒春來酒價忽然加山村野店如城市

都為遊人賞杏花 晉昌唐寅

曲巷疎籬野寺邊
藍橋重敘舊因緣
一宵折盡平生福
醉抱仙花月下眠
丁丑十一月望夕夜宿廣福寺前
作蘇臺唐寅

唐伯虎雨花臺詩帖

行楷書

雨花煙月此時逢
臺殿虛無古寺中
莫問六朝何事業
萬家砧杵弄秋風
友弟唐寅
艸上石壁先生吟壇斧政

祝枝山懷知詩帖

急就小行草書藏經牋本
題下有小字者係自注

懷知詩

歲寒十人

顧明府榮夫

雞山燕市每依依此日都拋入洛衣
家近鬱林公舊隱門如彭澤令初歸
空憐舊社惟君密却笑無車訪我稀
最愛滄浪池水好歲時同坐一方磯

錢太常元抑

入室芝蘭始見薰也知孤陋合離羣
煙霄本自冥黃鵠

城市安能駐白雲
震澤晚山青
厯厯漕湖秋水碧
泫泫相思只借中天月
會把清輝兩地分

王文學履告

二首

七十看花歲已殘
始憐梅蕊照衰顏
河清可道遭逢易
駕俗深慚會合難
錦繡口閒藏黼黻
驪龍珠抱媚江山
欲留光彩無窮事
心緒悠悠竹素閒

我居屢陌子滄洲
望隔江城各倚樓
共惜賈生違漢室
豈知王粲重荊州
青雲尚恐終難附
白璧空懷未盡投

十載三都墻壁滿不堪
玄晏思悠悠

葛隱君汝敬

獨承華緒振芳塵
想見先公氣魄新
開口只傳前輩事
存心不共此時人
城中紫陌藏巢許
門外青山是主賓
布褐一逢埃土盡
誰言叔度賤還貧

湯徵君文守

舞勺歌詩把袂儔
白頭俱換舊烏頭
深憐武庫豐懷寶
却羨名宗獨綴旒
擊壤舍君誰作伴
看山無我不成遊

高吟李白襄陽曲掌上隋珠國已收

謝處士元和

薰茗清談午夜陪詩筒拂旦又飛來應憐去日多來日
却見千迴似一迴槐院定酬王祐志蘭庭休起卜商哀
紅芳落盡青青在始信松筠是德材

表弟蔣允輝

風雨牀空坐燭闌分襟雨見物華殘蕭條鷗鷺江潮迴
寂寞宮商草樹寒王謝風流吾子在武功中外老夫單

懷君有句君應笑不向滄浪共釣竿

施侍御聘之

行藏蹤跡只雲萍一種神襟爾我形清角痛悲鳴晉鄙
黃鍾力挽向虞廷丹山鳳去尼丘歎紫府龍歸雪水靈
昨日書來淚盈把南溟心事到東溟

朱提刑升之

楚州

渚萍漂泊合江籬並逐東流更不移曾指松筠能晚節
共拋簪紱向明時煙霞草樹春容與河漢星辰夜陸離

慙愧逢人說桑梓只如黃卷對光儀

張秀才天賦

惠州

文征屢北道空南雲錦才華織女慚宗廟豈能瑚璉舍
蛟龍未許土泥奔襟期天合膠投漆光彩神驚玉在函
不見書來誦書序相望渾欲淚氤氲

先露八人

吳文定公

穆穆文定淵淵金玉風被四遠譽髦歸淑伊余小子欽

承在夙簡雲駿附潛泥蠖伏 詞林銜恤悶息茅廬扣
戶請益拱肅趨隅教曰勗旃竭景劬書黠爾富獲單辭
靡餘 選曹展邱俾書皇綸山房接夕返櫟同津永言
夙好旁搜前聞虛膺祇受充然萬珍 公者後先三四
及門一瞻百益敬誦終身望之如日就之如雲大雅既
喪悼實徒紛

王文恪公

肅肅文恪有嚴我師扣竭空鄙博約兼資片語必法寸

履皆規甘雨中含滋決時熙
屢躋於征靡辭有戚公
薦以升黃閣有職援呼晝三導掖漠百嗟予不肖鼎冶
負德 邦作封吏來相予總謂言冢君車迎館奉襄懷
報上寧公戾衆往趣成旁誚龐莫誦公聞斯愠命我專
統謂守載屬同羣答汕終亦靡克公愠滋勇有矢畢命
卒隊茲恐 公歸在堂復傳函丈三變泰如揚休彌暢
湖山奠高風霆下上嗟予懦與弗從以往中星載回遄
失几杖梁木既壞吾將安放

韓尚書

司徒巖巖四海具瞻孰不斂衽植偃礪頑蒙逖以卑霄
麗泥蟠訊之招之令之曰前旭日垂熙溫誨孔殷 昔
我先公政于晉陽知公于童拔立序庠範之德行訓之
典章古道世用啓迪游揚聲詩書畫亦靡不詳曰爾國
器必成用光公曰於乎前德不忘 乃共之食乃賜之
帛巖威儼恪靖莊允塞拜賜必誠餐德必實一望弗再
有銜以訖

沈周先生

有華東陽睦於吳門古也遺高展也茲存孰為先生秀
降三辰冒集萬寶手揮五雲九淵淑暎千莖齊芬鶴跼
霄遠抗首風塵維予二祖式契且姻親公自髫屬於
夕昕齒惟父子視猶季昆聚晤員員援推勤勤謂子良
史左邱馬班謂子鵬運直舉橫騫安知乘馬班如迤邐
終需于泥以卒歲年余既暮矣公猶歸然于何不臧
自遐不因一往不復追悔空辛豈念平生我思古人

本郡使君南海林公

昌哉我牧百夫之特瞬洞萬彗平吞四渤經庫儲學智
囊韜識鸞刀一振不截以訖吳材總升胡特我特載笑
載言載詠以繹有作斯屬慚孤善述冥留靈逝奚贖身
百九京有知有茹闐臆

陸冢宰

陸締於我好也奕世中丞汪汪視實兄弟翔泳殊然達
磐別致川梁無接錙鐔送契南都于邁日以文會勗哉

進修驩然游藝鷗鷺先盟江湖結氣
公績平寇尚克
銘紀首聚須臾夙約載厲迨登掌武爰均四海迹用地
隔禮由嫌廢穹淵契闊恍若越世 恩譴公被不才余
棄聚散忽再幽明永異終則羣疑始亦何諱丹誠寸積
悠悠兩在天吳晝掠鰲波夕沸茫茫大壑魂兮何寄

朱孝廉性甫

秀矣孝廉名駒在吳白玉清冰碧梧翠竹少游諸老孤
鶯喬木余家日見匪暝維夙黃庭晉度朱絃漢曲羣公

星落長庚爾獨後生更仰離羣昂鵠頽然順化行閱滄
陸修年默逝亦可世哭雅能君斷更莫彼續來英日富
風流絕目前修屢踐流膏醉馥嗟子勤哉堆箱疊腹翳
我與君髡皓相逐今我視衆如君我矚餘霜猶幾三歎
不足

朱文學堯民

葑亦多彥哿矣兩朱崑邱連璧嶧陽雙梧子出最後遺
風爽如寒泉冬潔菴竹秋癯積百媚學孰儷君劬宵聞

片籍屏寐以須先之皇皇獲之愉愉拋裘噴炙投玉捐
珠珍香寶茗法繪名書清談晏對日坐仙區愛我維篤
棄我亦除悵其邈矣臨風永吁余既作此詩未及書遺
諸君堯民首出紙索錄遂勉筆歸之他固不能悉然當
各寫所贈本篇以授之耳允明識

黃姬水跋見前

祝枝山書古詩帖

楷書

晉陽起唐祚王明紹景封垂統已如此繼體宜昏風塵

聚嬪天倫北辰司祿凶朝綱一以墜天樞遂崇崇淫毒
穢宸極虐燭燔蒼穹向非狄張徒誰辦取日功云胡歐
陽子秉筆迷至公唐經亂周紀凡例孰此容侃侃范太
史受說伊川翁春秋二三策萬古開羣蒙

朱光遍炎宇微陰藐重淵寒威閉九野陽德昭窮泉文
明昧謹獨昏迷百開先幾微諒難忽善端本縣縣掩身
事齋戒及此防未然閉闕息商旅絕彼柔道牽

微月墮西嶺爛然眾星光明河猶未落斗柄低復昂感

此南北極樞軸遙相當太乙有常居仰瞻獨煌煌中天
照四國三辰環侍旁人心要如此寂感無邊方

放勳始欽明南面亦恭己大哉精一傳萬世立人紀猗
歟歎日躋穆穆歌敬止戒傲光武烈待旦起周禮恭惟
千載心秋月照寒水魯叟何常師刪述追聖軌

吾聞庖犧氏爰初闢乾坤乾行配天德坤布協地文仰
觀玄渾周一息萬里奔頻察方儀靜隕然萬象存悟彼
立象意契彼入德門勤行當不息敬守思彌敦

大易圖象隱詩書簡編謚禮樂矧交喪春秋魚魯多瑤
琴空寶桺絃絕將如何興言理餘韻龍門有遺歌

顏生躬四勿曾子日三省中庸首謹獨衣錦思尚絅偉
哉鄒孟氏雄辨極馳騁操存一言要為我挈裘領丹青
著明法今古垂煥炳何事千載餘無人踐斯境

元亨播羣品利貞固靈根非誠諒無有五性實斯存世
人逞私見鑿智道彌昏豈若林居子幽探萬化原 枝
山祝允明書

祝枝山書聞絃詩

舟泊衢州城下暮赤脚苦蚊眼欲瞋逡巡就枕忽聞絃
已覺再聽還恐誤披衣起見燈影紅柔指鶯喉暗輕度
初聞乃是三絃語寂歷空江煙落霧少年慣向醉中聽
老大聞之猶起妬須臾演入琵琶絃指撥聲清不似前
疑是小璫更大封移宮換羽各爭妍斯時夜靜絃愈急
潛鱗出浴棲羽寒珠珍錯落玉盤淨鐵騎跋東封可懸
老夫聽久毛髮豎愁有蛟龍來搏船 右聞絃一首書

於虎邱梅花樓枝指道人

祝枝山詩草

長安昔日在關中洛陽浙右亦相同江東自古帝王宅
周秦已見氣葱葱長安石城如虎踞長道鍾阜似盤龍
千年王氣浮天表一日真人建法宮天府天開天闕起
五門三殿當中峙五鳳樓前柳似煙奉天門外天如水
金陵金闕勝金城玉陛連天接玉京星散羽林霜氣肅
天臨華蓋日華明十二飛樓石門繚百萬貔貅屯八表

寶刹天花和月飛郊壇神樂穿雲霄

叶御史當街百騎

驄將軍納陛羅霜鋒五侯甲第迷霧七貴前驅響鬬

風鳳凰臺上鳳凰遊玄武湖中水似油萬戶鶯啼花裏

晚千家砧搗月中秋會同館外白雉多包茅楛矢交經

過重譯來賓醉卉服輕煙淡粉列青蛾六樓六館鬪倡

妍日日新聲沸管絃狹市斜街迷錯落曲房洞戶暗鈎

連吳下諸生好遠遊抱書來看帝王州那知高臥西風

邸蓬眉蕭颯長安秋

右余所賦長安秋一首為希百

書之允明

東南大澤名具區中有洞庭相對峙七十二峰湖上浮
萬頃汪洋五湖水仙人隱士住高峯青天羅列金芙蓉
巖窟巉岈蹲虎豹渚宮幽閒潛蛟龍山人茅屋翠微裏
雞犬聲遙白雲起昔聞綺皓留此山今日高風亦相似
湖山橫黛畫中開湖水浮藍鏡中止還疑海上駕蓬瀛
豈識人間有朝市朗然吟嘯入煙霞山中萬樹開桃花
問津那許漁郎到伐木不知漁父家時見青崖麋鹿走

朝出為羣暮為友我欲共君歌紫芝借問山中何所有
贈洞庭張公山人允明

獨愛無人處幽棲不用名竹雞啼午寂松鼠落枝輕芳
草初平路春深欲上城蕭然吾亦得擾擾自勞生 右
題畫一首枝山

西望峻嶒擁國門秣陵秋氣動乾坤清江故有蛟龍窟
白日原疑虎豹蹲日滿荒城生野色雲來別渚浸山村
莫愁玉質歸黃土遮莫輕招月下魂允明

春山雨新沐，掩靄結濃綠。一葉金芙蓉，粲粲迎朝旭。
江亭小於艇，松子落滿頂。盡日無人來，流水抱虛影。
右二首子昂畫允明

白雲媚蒼山，寂寂太古春。窅藹林薄中，一區宅無鄰。
揚子並清淨，閉門了玄文。兩生勿輕過，惟通問字人。
客子欲何歸，中林猶獨步。幸有蒼蒼松，為辨去來路。
季冬雪裏積十日，奇寒沍啁啾。聞不聞，蔥蘢失其故。
梧桐滴夜雨，客香秋可憐。盡是離人淚，聲聲落枕邊。

右五首題畫幅枝山

落日採薇歸蕭蕭雨布衣邇來人採少春雨長頑肥
吳巖好箇景繫得不成山人自要頭白山頭也會斑

右雜作二首枝山

閒雲寂寂鎖龍宮萬頃春湖洗碧空惟有白猿聽講後
向人長嘯月明中呼猿洞作枝山

吟詩寫畫似參禪不向他人被裏眠生公堂前點頭石
天平山上白雲泉

秋浸具區天地寒老崖垂脚怒龍蟠仙人夜半騎鶴去
木客潛窺古竈丹

雲母薄梳青石髮水花肥點碧荷錢樹根一坐空山老
不許時人問歲年

寒光交逗眼蒼然半夜人間別有天想得非仙亦非鬼
四山風雨擁孤眠

滿地松陰六月涼採芹歸來擔頭香相逢夕照誰家子
倚樹喃喃話正長

身在雲西夢想間
松頭鶴影枕屏間
一聲隱隱啼花雉
信手推窗滿眼山

朝雲乍起千峯冷
暮雨初收萬壑鳴
此地煙霞誰領畧
却輸痴老筆縱橫

腰刀帕首報君恩
初事將軍出雁門
無限家門兒女念
秋風吹上五陵原

費却青錢換戲資
世人多道小兒痴
不知世事誰非戲
爭得長年作小兒
右九首題畫 枝山


扇功本在驅炎上不似屏風只好看
算得題詩真拙計
卻供雙眼失清寒
題簞允明

祝枝山書五言排律帖

楷書

嶺海元勲士成都世望豪山河高祖誓龍虎太公韜
植歸爪鬣騫騰見鳳毛都臺知獨早列校柄專操
烈烈平蠻績遑遑定國勞東通越裳雉西卻旅人
葵玉帳抽奇策牙旗偃怒濤頻煩膺重寄稠疊受
恩褒魚水尋常願風雲二五遭雨江嚴副鉞五府
侑樞曹特命司符鑰

元戎總節旄風生新草詔光動舊花袍拔浪鯨魚振橫
秋鷗鷺翺諸侯惟敬梓大雅在揮毫再拜歌崧嶽宣王
百代高治生祝允明頓首再拜稿呈



六藝之一錄卷三百八十八

欽定四庫全書

子部

六藝之一錄卷三百

八十九至
九十一

詳校官中書臣陸湘

貢外郎臣牛稔文覆勘

總校官檢討臣何思鈞

校對官助教臣胡予襄

謄錄監生臣吳三詠

欽定四庫全書

六藝之一錄卷三百八十九

錢唐倪濤撰

歷朝書譜七十九

明賢墨蹟

詩翰

吳文定懷脩竹書隱詩卷

春雲漠漠雨溟溟
假寐書床午夢醒
十載客居便巷陌
一時鄉思繞園亭
繁花照檻知堪賞
亂石鉤衣憶所經
恰有古苔三畝綠
都來脩竹萬竿青
當窻好鳥通人語

挂樹危藤學字形日射韭畦朝可翦香凝機室晝長局
鹿場舊築猶存號鶴冢新封未刻銘架上殘篇歸擬讀
移文不待北山靈鹿場居士

吳文定贈以岩詩冊

籊籊猗猗疎雨立豈獨衛風名始識條將長身托放曠
水墨似嫌依六逸臨風首肯對以臆謂我此言人莫敵
歲寒雅操從少習玉版禪機尤秘密毛髮蕭蕭垂紺碧
湘江新沐如膏濕鷓鴣日暮啼且集任公東海登釣石

高竿未斫礙雲石運思正慰王猷憶深林溟濛煙雨滴
風動仍聽無孔笛湖州已遠休物色薊州無復齋名息
百年筆法尚能傳篋中喜為鄒陽得 右題畫竹元博
湯翁愛茶如愛酒不數三升並五斗先春堂前無長物
只將茶竈連茶臼堂前無事常煮茶終日茶杯不離口
當筵侍立惟茶童入門來謁惟茶友愛茶有詩學盧仝
烹茶有賦擬黃久茶經續篇不借人茶譜補遺將脫手
平生種茶不辦租山下茶園知幾畝世人肯向茶鄉遊

此中亦有無何有 茶歌

世間只有雲疎懶不道君猶懶似渠
載雨從龍雲有意出家離俗子何疎
雲常隨爾棲岩穴爾亦隨雲參太虛
願爾與雲母拆伴千秋萬古永如如
贈人

霜染秋林葉未紅白雲如海晝冥濛
山中雞犬無塵到谷口漁樵有路通
雙履行蹤留蘚逕五絃靈籟響松風
浩歌招隱披圖畫目斷冥飛縹緲鴻
題山水

累月不出門西山了無見新圖偶攜來
如見西山面積

雨適初晴疎雲謁層巘林堂接溪橋有客來獨便況有
釣魚人不作臨流羨石湖在吾前臥游殊未倦 偶為
陳冷菴憲副題石田山水以岩過醫俗亭見之請書于
扇遂為執筆歸之匏菴吳寬

吳文定雜詩卷

詩內小字
俱自注

絕句謝獨山送杏子

一樹臨窻初試花又看結實壓枝斜薰風吹熟甜如蜜
投我何須用木瓜

次韻司徒周公謝獨山送杏子杏為公舊植者

親手移來別苑花
隔窻窺見數枝斜
蚤知結實甘如許
何用青門去種瓜

數顆累累映雜花
方庭紅日影斜斜
夜來風雨還堪惜
已似黃臺四摘瓜
右拙作呈太宰先生詩伯求教寬再拜

右廂前有樹一株花開細白而香結實甘美

人云馬櫝榔嘗疑其名不雅今衍聖孔公過而識之曰此文官花也青兗間多有之於是其名始定寬因記前輩有咏此花者乃賦一首呈太宰公教而和之

繁花如雪散清香一樹蕭疎近左廂結實回甘非橄欖

冒名襲謬是櫝榔郭駝有術能移活

郭索駝傳云駝所種樹移徙無不活

東哲無詩為補亡

晉東哲嘗補白華之詩

人說吏曹宜種此掄材

應許勝枯楊寬拜上

承金桃之惠聊奉青李為答侑以拙句意見
乎詞

金丸投我愛形尖報以青瓊幸少嫌鸚鵡啄餘猶自美
蟻螯食後却傷廉不將土物空相遺盡在公門更勿謙
向晚登堂官事了兩翁一笑定掀髯寬拜上太保冢宰
先生執事七月六日

昨偶論及世俗以老態從上為壽徵戲成二
絕句用發笑粲

六十餘年作宦游未知前路幾春秋人言老態須從上
白盡髭鬚正不愁

白盡髭鬚正不愁吟詩撚斷更風流從今越把詩吟苦
索性教他白到頭 寬上丹山老先生詩伯

秋壇陪祀知有高作僕亦先得四句因足成
之錄以請教寬拜

殿外冷風似颯然即看庭燎列星躔牲肥豈秩無文祀
穀熟當書大有年舜樂九成神欲陟魯宮三望事猶傳

小臣十載從龍處憶侍鑾輿向藉田

嘆庭前枯槲偶爾有作寫上求教

庭院陰踈日又西
條然相對有枯槲
霜餘少葉綠蟲蝕
月下無枝借鳥栖
不及蕙葭猶倚玉
爭如桃李自成蹊
吾生老態還同此
禿鬚臨風句強題
寬再拜丹山獨山
二長官尊契

奉次高韻謝獨山惠李得三絕望教之

碧碗盛來黃玉團
良工雖巧未能鑽
臨風更帶清冰嚼

併作人間六月寒

誰言蠮食不成團綠幹生蟲未許鑽若作和羹須此用
分明入口覺酸寒

牛心空是赤團團

李有牛心紅

黃玉懸枝却似鑽須共楊梅

三百顆冰盤錯落照人寒寬拜上太宰先生老詩伯

懷軒落成適喜遷入拙句奉賀聊致微忱

翼然高架忽臨墻還似三槐舊築堂期待已同王氏貴
欠伸無礙宛邱長心懷北拱天逾近手選南遷日更良

獨坐齋居方禁酒自慚持賀只詩章
寬再拜太保先生
尊契丁巳仲秋八日

蒙以高作送後園新梨繼又承送棗併次來
韻以謝寬拜上

守株終日嘆園公佳果初嘗味不同
若比蟠桃須落盡
三十年內幾番風

手分佳果出山公赤玉擎來顆顆同
莫向盤中容易食
枝頭歷盡是霜風

胡桃沙果皆後園佳味也承特分遺兼索拙
言敢具二絕奉謝恐亦不能默默也寬上丹

山詩伯長官

西域移來舊得名青皮未折韞瓊英秋桃數種皆堪食
有核何曾向外生

右軍帖裏見來禽回首吳城憶果林

寒家有園數畝皆種此果

忽地

摘來紅玉子省中秋色後園深 七月廿五日

庭梨數枚奉上敢以拙詩侑之

誰道枯槲生意遲秋來結實尚離離斑多或被蚊蠅啣
味美還招鳥雀窺律在不妨猶擅食詩成相送敢違期
玉丸流液能消渴日啖何須說荔枝寬拜丹山先生尊
契執事仲秋十四日

承送佳瓜兼押前韻同至不容再和然此情
不能自己也乞笑置之寬上

蒂脫黃花帶雨香送來又喜出東廂故鄉回望仍思芡
新韻交投強押榔碧瓠形圓犀獨滿紅漿味美舌難忘

令人欲作青門隱不羨他家果姓楊六月廿八日

再承以高作送瓜感感輒有李子數枚奉上
仍次前韻發齋居一笑

摘處猶沾白雪香家僮忽送到前廂江陵莫謾誇千橘

嶺海何須說兩榔

謂嶺榔
枕榔

廉士甘貧殘可食貧夫營利

吝終亡強將詩句臨青李敢比書家倒植楊寬再拜丹山
老先生

承送新榛敢以小詩奉謝

七月遼陽已降霜簪頭落地野榛香三年不到燕山下
又喜平章玉顆嘗寬頓首太保老先生詩伯

粗箋奉上正愧不足吟藁之費反蒙以多為

辭再次前韻答之

一歲詩成知幾篇洛陽高價起華箋況公更有鵝羣好
未滿黃庭字五千寬拜上

齋居一首奉上丹山太宰先生求教

齋閣相通畫舫同置身書卷筆床中沾衣尚帶丹墀雨

揮塵難招玉宇風高柳鳴蟬驚旅客枯槲行蟻對衰翁
到來兩月慚無補又是人間伏暑終六月廿九日寬拜
承以高作送槲次韻為謝且為此蟲一辨明
耳

樹杪薨薨最惱公送來數顆味應同要知落地渾無損
不是遊蜂還是風寬頓首

家園粗果蒙用前韻以仙棗見許愧感之餘
輒復和答寬再拜

詩贈吳郎有杜公西鄰撲棗事還同莫將仙果來相比
小圃安能抵閨風

吳箋數幅供用敢以短句侑之

入手新詩已百篇奉償日費有吳箋欲知供得高才足
歲取於今擬十千寬頓首

奉謝惠榴仍次來韻

霜坼當階紫玉胎珊瑚一握案前堆欲知佳實何從得
亦是張騫奉使才寬頓首丹山先生尊契

蒙以小園種茄未實有詩見嘲次韻奉答公
餘覽之用資一笑

助長何曾似握苗園丁早種況多朝他畦待作牛山木
結子纍纍敢自料寬再拜太宰老先生詩伯六月十
九日

徑寸渾如山下苗喜逢好雨自連朝東園摘盡西園摘
遲速無妨亦可料奉和食茄有感高作併呈獨山長
官發一笑晚生寬再拜太保老先生執事六月十八日

三次前韻奉送小園茄子

野外空聞無麥苗園中采掇自終朝向來詩裏累累語
地產誰云不可料

四次前韻謝送茄子

團團紫玉少長苗相送須知在此朝莫使園官俱摘盡
秋深還有作羹料寬頓首

范霖跋一則見前

陳白沙書雜詩帖

草書 帖內闕文止
存一二句者不錄

采菊復采菊嚴霜下庭木豈無桃李顏畏此天地肅落
落枝上英未傷飡者獨持贈楚人歸投之江魚腹

閉門春雨可憐花誰共花前傾紫霞但放此杯深似海
四公肚裏得橫槎

紅日花開綠渚潯秋來霜橘又垂金美人家在紅雲島
句闕

春光淡蕩老花潯絕岸回風落碎金一路潯潯煙鎖斷
無人知道此溪深

川練縈紆島上花
世間遙望赤城霞
僊源不是函關路
老子來時坐一槎

口銚與衡山詩

行書

甲子廿四夜即事奉次廿三鞭春霜押因便

錄成博笑

臘雪漫漫春意慳
兒童爆竹鬧庭前
昨朝耒耜迎新歲

今夜田蠶卜小年

俗呼廿四夜為小年夜

長飲淘溶情有限
短吟

消遣興無邊
流光可惜還堪賞
楊柳柔條半鎖煙
鑰頓

首上衡山先生吟伯

錢鶴灘西湖諸詩帖

行楷書

西湖懷古五章

武林名勝此開先再拜荒祠一惘然詩裏滑稽方朔後
酒邊閒適阮咸前青衫不為江州濕白髮猶參九老筵
六井寒泉通竹閣至今湖柳映湖煙右懷白樂天

喚起梅魂鶴夢迴先生踏月雪中來不書封禪驕時宰
頓遣漁樵壓上台天子寵頒和靖號野翁呼上子陵臺

香山居士還多事供佛于今看冷灰 右懷林和靖

范老先憂四海知如何荒歲日遊嬉湖中景物能宣鬱
土木塵勞可濟飢志大由來驚俗眼心公端肯避時機
紛紛獻額賙貧者斗粟誰償二月絲 右懷范文正

誰云造物特鴻龐妬殺完名直欲降此老生來持勁節
洪鐘隨處噓微撞于今精彩蟠吳嶺當日辭源瀉蜀江
怕讀潮州韓廟記後來誰有筆如杠 右懷蘇東坡
當年許國已忘身敢道枯骸尚幾春歸死九重心亦幸

生憐二廟恨誰伸
檜應讐主非讐
我不怨金空怨秦
再拜南枝斜日裏
剛腸舞劍肯沾巾
右弔岳武穆

西湖即景五章

詩到西湖敢擅長
蘇翁白老恐尋常
九天翠黛開金影
萬朶芙蓉落鏡光
點綴丹青漁艇亂
安排法象化工忙
誰將容易看西子
縱有蛾眉不解裝
湖上作

攬將春色報西湖
何處江山更入圖
百二樓臺煙雨合
八千甲子皞熙無
雪梅封老新更蘆
水梗儲陳始樣蕪

簾蕩水晶初霽日看花雙眼半模糊 陳長史庄

閣雨輕陰山益竒山靈不慳我來遲斷崖雲脚能連續
曲磴湖光自委蛇賓主東南真盡美煙花宇宙又撩詩
索梅笑罷方成句人景相逢定有時 瑪瑙寺道上作

寶藏如來忽雨華名山不著野花遮金蓮捧足當湖曲
瑪瑙支空鎮海涯謾說坡翁留玉帶可聞六祖付袈裟
毫揮不盡珊瑚采南北峯頭煥晚霞 贈寶華和尚住
瑪瑙寺

蒼松夾道擁旌幢逸興從教到此降雪竹折枝猶自茁
雲崖成屋更誰扛眼前山色收歸句意外風光縱入窻
名勝更饒珠玉滿盡看雙壁主人江 江學士二弟遊
石屋鄉晚生錢福再拜呈稿

錢鶴灘五言絕句帖

行楷書

放鶴灘頭水縈迴若有情月明長見底應是發源清
觀瀾到東海洶湧尾閭門回首崑崙頂千流總一源
空谷偏能響青銅多幻形中間若無滓到處是虛明

錢福

朱性父奉賀膚菴先生致仕詩帖

楷書

膚翁家近匏翁家二老風流世並誇歸已一人今白髮
門無五柳自黃花山林日月為詩社霄漢星辰遠釣槎
莫謂草玄終寂寞還來舊雨有侯巴侍生朱存理拜藁

孫忠烈燧律詩四首

坐對湖山酒一觴醒時歌舞醉時狂丹砂不是千年藥
白日難消兩鬢霜身後碑銘空自好眼前傀儡為誰忙

要知閒處且為樂光景無多却散場

醉眼昏迷懶得開自斟自酌且舒懷百千萬事了不得
六七十年容易來得一日時過一日遇三杯滿飲三杯
世間多少英雄漢南北山頭土一堆

懶與時人論富強富強原不是良方石崇金谷今安在
韓信凋弓昔已藏產置百年終換主氣橫千里總淪亡
不如守分存天理錫福兒孫更久長

病中守病要心寬調理隄防有幾般強食損脾饑損骨

多言傷肺怒傷肝常留腎水消殘火緊把鉄衾護歲寒
有眼如盲耳如聵一些塵事莫相干

周貞菴同年燕集詩帖

行楷書

丙辰己未同年燕集一首錄上冢宰白川宗

丈老先生請教

卅年前共曲江春六百名來止六人一會又將淮海別
相看真有弟兄親風雲際合天邊客鬢髮蕭疎夢裏身
累疏乞休休未得不知何以報楓宸侍生周倫頓首藁

上

吳茶鄉東莊小集詩帖

小楷書

人日偶同諸友東莊小集分韻得詩字呈膚
菴尊丈先生改教

小莊閒探早春時有客同游不假期聊謂斯辰循故事
漫搜佳句入新詩疎梅隔水香飛遠野鳥投林語到遲
晝短還思繼深夜相逢難復是相知契家姪吳奕再拜

上

毛白齋題也適軒詩帖

草書

奉題也適軒用主人水村先生詠懷之韻

煩思劇紛糾閒情澹紆餘達人有張弛豈以形骸拘聊
開屋角圓小構花間廬漪鱗集深藻林羽鳴高株向來
車馬巷忽若瀕海隅石峙勢彌聳雲孤心與俱於焉足
遐想所翫非細娛憂勤贊邦治反覆窺前書詎效古巢
許高言藐唐虞列筵會直率拊景共跼蹐清觴發新詠
一使客眉舒習池將在此此老山公如太倉毛澄

王履吉祝吳遜菴詩

憶昨玉山陽恭陪錦袍宴明公降顏色腐儒畧踈賤樓
銜雲端峯花滿川際甸逶迤匝金卮徙倚傳銀箭歸來
卧蓬蒿斗柄忽三轉惟公傑魁人竚立端華弁深山鉅
谷間龍虎騰雄變天開棟柱姿捫腹藏組練雪峯阻岷
蜀濁河繞徐汴腰懸朱雀符手弄白羽扇赤心日月傍
青草郊原徧未拜黃霸徵俄擁疏公餞焚魚飽天和解
帶酣清燕廓落得翱翔與時而舒卷煙霞散玉質瀟洒

江湖面千載永游遨松喬何足羨正德丁丑八月朔旦
為大參遜菴吳公七十有五誕辰敢獻短章揄揚厥美
晚生王寵謹書

王履吉還山詩

久欲歸西山囂喧漫鞅掌當陽麗江臯孤雁獨欣賞巖
餘白雲停水接紅霞上地軸隱墳藝天池滙決潏蛟人
鼓安流玄牝遺清響秀色溢層巒虛光涵萬象川原信
沃腴景物初駘蕩覽化自靡窮遵性非外獎彼美邱園

賁眷言興我想

恭承休明日九軸今一家進則綰龜玉退則蟄龍蛇吾
道苟不虧安用事咄嗟山川日閒曠土風頗清嘉躡步
陵孤峴流目翫歸霞鳴嚶藹以豫陽林美漸花風光枝
上汎日采水中華感物眷彌結悟空理已遐永言徹玄
寂聊以遣紛拏

環洲信壚瓏灌莽何葱蒨中有方丈室聊以酬清燕對
嶺屯白雲旁林繞碧栴時聞樵採音日覽湖山變綠蟻

忼獨持道書慵不卷玄言謝丹轂散髮却瓊弁頗懷康
樂憂幸乏子牟戀寄言賞心人歲晚同茲眷 己丑上
巳日雅宜山人王寵書於石湖禪院

王履吉題詠詩蹟

秋水百川灌雲帆楚翼飛大江離地紀旭日對天扉表
裏黃圖壯東南紫蓋非英雄徂落盡霄漢仰垂衣 右
渡江

瓜步臨江出鍾山不論雲風蘆吹淅瀝沙鳥拂氤氲北

控淮徐阻南瞻斗極分輕帆移過穩把酒玩峯文 右
瓜步山

玉壘疑連漢牙旗認插雲樓船橫海出斧鉞自天分紫
翠中原氣山河大地文我皇開日月萬古淨妖氛 右
石頭城

昔誦北山文今棲鍾阜雲秋林時夜嘯天樂忽空聞弟
子胡麻薦頭陀罽席分那知江海客不亂衲衣羣 右
雞鳴寺

萬木黯成雨千崖殊欲秋魚龍成水戲巖壁亂雲流蓬
累栖窮士天心共海鷗侯生居語女吾道付滄洲 右

山居

山中有流水借問不知名暎地為天色飛空作雨聲轉
來深澗滿流出小池平恬淡無人見年年長自清 右

咏泉 王寵

王履吉題畫諸蹟

過雨山堂蒸翠雲四簷藤竹鳥聲聞青天不動峯文坼

錦石相鮮礧道分流水桃花真隔世
草衣木食自為羣
籠鵝寫帖關幽興却憶風流晉右軍

遠岸疎林斜日外春風碧水草堂前
匡廬突兀開屏障
坐看銀河一道懸

石湖春色逐人來試問東林老萬回
何處梅花承雪吐
誰家柳色弄煙開

夾岸青山掛玉壺桃花流水入虛無
何時天上階微祿
會向君王乞鏡湖

僧到清齋禮佛客來豪飲譚天但得閒消長日何須苦
計千年

生平最耽懶慢病後休苦支持或素或葷度日不巾不
櫛隨時

有客別離許久緘題相訊如何落得北窗高卧起來醉
茗狂歌

夢裏却忘家累病中始信身閒得句微吟抱膝有時枯
坐閉關

客自豫章遠過使從燕市初來為語禮文寬放應憐書
劄懶裁

我愛僧家不二僧還讓我義皇勘破應無妄想知足便
是良方

掃逕貪看松竹攀繒喜得魚鰕恐說床頭甕倒不覺林
間日斜

楊柳村邊小艇荷花池上清樽已遇田夫野叟何來公
子王孫 王寵

王履吉石湖八絕句

石湖春色太可憐，
却似美人明鏡前。
錦甸平鋪鴨綠水，
白雲飛動蔚藍天。

星橋北挂瀉春流，
映出黃山水面浮。
霞石天青飛練鵲，
桃花氣暖醉輕鷗。

春山面面翠屏開，
盡繞吳王百尺臺。
一代霸圖憐燼滅，
五湖流水恨東迴。

三月莫春春服成，
含風疊雪越羅輕。
生憎乳燕撩春色，

轉遣飛花蕩酒情

越來溪上柳千絲
畫鼓游船晚更移
一曲紫雲歌
粵女雙鬟白雪舞
吳兒

數松磊落千尺強
恰如天際羣龍翔
吟風嘯雨中琴瑟
大澤深山藏棟梁

古木朱藤踈著花
淡雲斜日靜江沙
黃金臺上無推轂
白石山中有歲華

登山臨水春將歸
獨樹桃花猶未飛
玩世繁華真倏忽

後時顏色轉霏微 王寵

王履吉詩帖

錫山舟中對月

春水無邊闊揚帆月窟遊煙花迷四顧
盃酒謔中流川勢分襟帶檣標犯斗牛
平生搖蕩興長嘯下滄洲

鄭博士官舍夜集

久別情何限相逢各惘然夜堂人影寂
春夢燭花燃縱飲杯無算重臨月正圓
百年萍梗迹江海暫牽連

白氏園燕集

金谷王孫燕名園選日開
地藏南國岨花借上林栽
峯勢三台象賓遊四海來
玉杯淹坐久深媿鄴中才

晉陵夜泊懷鄭博士

入舟渾不樂追憶轉蒼涼
帆帶春鷗沒江連夜雨長
百年雙旅鬢一日九迴腸
憑藉關門水西傳淚幾行

惠山酌泉作

鼎食非吾事泠泠冰雪腸
煮茶師自得折屐興偏長
花

氣熏泉竇山形拱石堂江湖自有樂高詠和滄浪 王
寵書似東橋先生教正

王履吉書楞伽弔古詩帖

郊臺

長嘯登高臺穹然半空倚夫差昔郊天傳聞於此地當
時英雄心北望耽虎視正朔尚周官孟冬日初至金輿
戾行宮龍旌托千騎維王御大裘珮玉垂赤屣瓚采將
奉間翼翼禮則備嘗聞古人言斯固萬乘事天王在洛

邑子國何裡祀彼蒼豈福詢驕縱帝之棄寧知會稽山
劍戟已堪試觀此亡國君千秋可銘識

吳王井

西施自矜色曾照當年井至今碧桃花尚落嬌娥影我
來得暫窺千春一交頸願為雙鴛鴦白首相與永佳人
難再得此樂何由騁長歌激悲風落葉銀牀冷安得青
銅瓶繫之千尺綆或有鳳凰釵沈淪拭光景

越來溪

五湖何漫漫綠水從空來經過百花洲却繞姑蘇臺吳
王全盛時日夕此銜杯玉簫天上落錦帆鏡中開云是
子夜歌曲度清且哀一朝越兵八千里如奔雷旌旗繞
碧山滿目飛塵埃朝為黃金闕暮作青草萊千古霸圖
盡英雄安在哉不見東逝流幾時得西回秋風吹我衣
但可傾金壘興亡互起伏此理誰能推

御書亭

范公江表英功成拂衣起飄然五湖舟再見鷗夷子蛟

龍有遺迹千春照綠水當時君臣間相得乃如此中原
尚虎鬪黃鵠遽遠徙將非矰繳繁小人之所使有才不
能用自貽多壘恥胡馬飲河津黃屋雨金矢惻愴范公
靈此心安得死 呈東橋先生王寵頓首

王履吉書薊邱懷古并酬暉上人詩帖

草書
紙本

薊邱覽古

北登薊邱望求古軒轅臺應龍已不見牧馬生黃埃尚
想廣成子遺跡白雲隈 軒轅臺

南登碣石館遙望黃金臺邱陵盡喬木昭王安在哉霸
圖悵已矣驅馬復歸來 燕昭王

王道已淪昧戰國競貪兵樂生何感激仗義下齊城雄
圖竟中失遺歎寄阿衡 樂生

秦王日無道太子怨亦深一聞田光義匕首贈千金其
事雖不立千載為傷心 燕太子

自古皆有死徇義良獨稀奈何燕太子尚使田光疑伏
劍殊已矣感我涕沾衣 田光先生

大運淪三代天人罕有窺
鄒子何寥廓謾說九瀛垂興
亡已千載今也則無推 鄒子

逢時獨為貴歷代非無才
隗君亦何幸遂起黃金臺

郭隗

酬暉上人秋夜山亭有贈

皎皎白林秋微微翠山靜
禪居感物變獨坐開軒屏
風泉夜聲絕月露霄光冷
多謝忘懷人塵憂未能整
戊子二月望日夜坐石湖山房寫此雅宜子王寵

都玄敬宿天王禪院詩帖

宿天王禪院贈西洲講主南濠居士

山檻秋光落經卷土岡高竹晚增幽煮茶燒笋能延客
欲去因君復少留

顧與新度辰海謠二詩帖

十月廿日度辰作

緊茲孟冬日昧爽曰余降修期若恒度厯年歎漸崇少
壯忝通籍老大植等功乃者南海堦三載更已終履危

過折阪飄跡類飛蓬豈伊生有後寧云道斯窮聖澤本
汪濊游泳咸從容片言華袞服一朝右鼓鐘疲繭自偃
蹇嘉會曷苟逢迨今歲將暮揔轡旋我躬 右近作呈

海謠

誰謂海險可以乘桴叶誰謂溝小可以覆舟彼人之志
兮將執天子之吏兮

誰謂海險波則突之誰謂溝小風則汨之彼人之競兮
將拒天子之命兮

誰謂海險曾不撓濟誰謂溝小曾不容治珠崖之捐兮
疇昔然兮

誰謂海阻天罔弗知誰謂溝遠民罔可欺謂予不恤兮
有如皦日兮 侍生顧可久頓首拜稿四月十二日寓
南雄勒具

顧與新謁張公祠詩帖

行草書

出大庾嶺謁張公祠下作

驅車出粵關今日是生還巨海尚容易一溝何阻艱蝮

蛇沮澤遠雲樹洞林間來謁公祠下增生烈士顏右拙
稿敬錄呈 泉吾老先生契史求遠教侍生顧可久頓
首四月廿二日寓南浦具

方時鳴北固山詩東

行草書

久以多事遠涉未承候杖屨此中抱歎登潤州北固山
甘露寺得詩二首呈上請教且以致殷勤云

南歸多覽眺北固始經行殿古丹青剝巖深草樹平佛
香幽自散塔火晝還明共有紛華念無人此繫情

獨上平臺立飄然眼界寬金焦雙砥柱江海一杯盤撫
景容孤嘯披圖縱大觀歸與山月上詩骨不勝寒 晚
生方鳳頓首秋汀老先生尊丈 日來秋暑肆酷貴體
萬萬調護以全百年之算至願至願

蔡林屋詩翰

老去倦茅屋五日頭不沐侵晨東家子邀我看新竹東
風吹梅落忽見燒痕綠上山雲推人下山泉湧足蒼鼠
剥古栗白羊竄深谷丹竈雖生苔紫巖尚堪宿渺哉人

間世千載見遺躅當時僧不知今日吏催促但恐有高
節無處著松菊七十二點青對酒聊一掬 右春日到
鹿飲泉賦此書似尚之林屋蔡羽

人龍未逢時林卧觀玄化抗館碧山隈伏檻滄浪瀉連
巖象雲壑嵌空紛石架明霞麗壁璫濺瀑翻甕瓦其陰
負縹緲其陽展銷夏山川恣凝綠乾坤莽高下端居慰
營魂散帙豐逸暇觚管閒時操觴酌巡筵迨我躬自忘
疲樂客窮玄夜時哉秉燭歡合坐同所藉 右玄秀樓

與諸友宴集蔡羽書

短景仍多濕殘年畏客歸白雲谿上冷紅樹雪中稀久
住應難別重逢寒暫違憑人問林屋煙霧滿征衣 德
宇與余兩年往還頗密忽欲解館歸越不能為情話別
之次賦此正德丁丑閏臘日林屋蔡羽

盈盈金屋舊時紈自小題名喚合歡照夜巧憑螢點綴
賽秋還與月團圓昭陽愛絕遮羞怯長信宮深滴淚寒
拋棄從人承素在桃花殘影自堪看 右題紈扇蔡羽

王酉室詩草

蘭若閔林邱花朝共此游風傳鈴閣響雨益劍池流俯
瞰千人石高憑百尺樓當歌還對酒戀賞未回舟

靈阜枕通波方舟薄晚過雨聲希澗谷霽色映松蘿東
燭還更酌飛觴不住歌歸家踏清影微月在簷阿 右

游虎邱二首穀祥

橫塘別墅敞危樓結夏乘風此度游屏列蒼山開竹徑
帷齊碧樹艤蘭舟阮渾視我仍青眼王粲違時已白頭

對酒歎惊何以減山陽吹笛正悠悠 游宴

逃暑應能暫閉關未消多把古賢攀欲拋杯酌方為懶
少事篇章恐礙閒風墮一庭鄰寺葉雲開半面隔城山
浮生只說潛居易隱比求名事更艱 右閒居秋日祿
之王穀祥書

沈子公舊日詩帖 行草書

舊日集賢里居人晦跡深一隨松菊隱幾度杏花陰洗
藥溪邊濕求醫月下尋却思晉時逸林竹寄幽心東老

沈霽子公

六藝之一錄卷三百八十九